



أنا بالنسبالي كانت كلمة ثورة دي كانت حاجة أصلاً بتتقرأ في الكتب بس. عمري ما كنت اتخيل إن هشوفها أو هعيش في ثورة. يعني حاجة غريبة جداً، جداً، جداً، وفكرة في الأول كنت بشوفها من شباكى والأول مكتتش باعمل أي حاجة أصلاً. كنت بقف في الشباك اتفرج.

لدولقتي أنا حاسة إنها خلاص، فهمت يعني معنى الكلمة بجد. حتى الناس اللي كانوا ثورجيين أوي، بس عمرهم ما عاشوا ثورة، مش فاهمينها. بتفهمها كويس لو عشتيها بجد.

قاموس، الثهارة gamosalthawra.com

إنّ بتطلع تعترض على حاجة إنت شايفها غلط، من وجهة نظرك. مش لازم الناس كلها تبقى شايفها غلط. إنت شايف إن دي غلط وعاييز ترفضها فإنت بتطلع في مظاهرة، بثورة. الثورة بتبقى عددها كبير أوي... غير المظاهرة. المظاهرة بتبقى عددها شوية قليل، بس الثورة بتبقى زي مليونية.

ثورة يعني عدم الرضا عن أوضاع معينة والرغبة في تغييرها، باستخدام بقى التعبير عن الرأي بصوت مرتفع. الثورة متنفعش من غير تجمع، لازم تجمع ناس كتير بيعبروا... بيعبروا عن نفس الرغبة في التغيير.

يعني تدخل في الأوضاع السياسية والاجتماعية، ده المعنى بتاعها. يعني بيحي يقوم الشعب بيقوم بثورة، بتدخل في الأوضاع السياسية والاجتماعية. يعني هما بيلموا ناس ويقولهم: «احنا عايزين نهاجم كذا، احنا عايزين نعارض كذا»، تبقى معاملة زي المعارضة. هي دي الثورة.

الناس قرفت، جالها حالة قرف من نظام مبارك. كانت تنزل في أيام مبارك، كانت الأعداد بتبقى حوالي ثلاثين واحد وحوالي مية وعشرين واحد عسكري أمن مركزي محاطينهم، عشان نازلين بيقلولوا: «احنا مش عايزين ده. احنا بنطالب إن ده يتغير». اللي جه بعد كده الناس كلها اتحدت مع بعض ونزلت يوم ٢٥ يناير ودي كانت الثورة الحقيقية.

ثورة عبارة عن مجموعات من الشباب... تمام... شايفين إن في غضب، ليهم مطالب، ليهم مطالب المفروض تتحقق، شايفين إن في ظلم في البلد، تمام؟ عاشوا ثلاثين سنة ظلم، شافوا وقت إن احنا ننزل الشارع ونطالب بمطالبنا. احنا كشباب نزلنا عملنا الثورة.

ناس نزلت بشكل غير منظم وبدون أي ترتيب أو أي حاجة... أيا كان العدد، الناس نزلت، ملت ميدان التحرير الأول مكناش نعرف إن دي الثورة ولا أي حاجة: فاكرينها مظاهرات عادية. بعد كده الأعداد زادت وكبرت. من هنا إنطلق مسمى ثورة، اللي هو الأعداد بقت كتير جدا.

كلمة ثورة في حد ذاتها اتعرفت عندي وأنا في أسكندرية على البحر والناس جاية خلاص... الثورة الحقيقية هي ٢٨ يناير... يومها لما لاقيت ناس كتيرة، كده خلاص.

ثورة يعني الشعب كله ينزل عشان يشيل الحاكم اللي هو مستبد، اللي هو قاعد بقاله كذا سنة عشان هو مش عاملهم أي مصالح، بيحقق المصالح اللي هو لصالحه هو الشخصي.

مفهوم الثورة عندي: تغيير نظام. تغيير النظام وتغيير الدنيا كلها.

يعني إنتي بتحتجي ضد نظام. يعني بتحتجي ضد حاجة فاسدة، ضد نظام فاسد، ضد قمع، ضد ظلم، ضد أي حاجة... أي حاجة قامعة حريتك، كبتة صوتك. أنا بالنسبة دي ثورة.

تغيير... تغيير للأحسن. لو تغيير للأسوأ تبقى مش ثورة. معرفش بيسموها إيه، بس حاجة وحشة يعني.

المفروض الثورة تبقى في كل حاجة يعني... تبقى حتى في مجال العمل. إنتي بتشتغلي في مكان، أن إنتي تعترض مثلاً على المدير ليكي: ده في حد ذاته ثورة.

كلمة ثورة معناها خروج عن المألوف، خروج عن الريتم العادي، محاولة تغيير الواقع بالقوة. طبعا تغيير بالمظاهرات الإعتصامات والإضرابات وبتبندى بمرحلة هدم، ثم توقف عن الهدم، ثم إعادة البناء والاستقرار، وبتأخذ فترات قد تطول وقد تقصر.

الثورة دي المعروف عنها إن الشعب بيثور من الغضب، فبينزل عشان يغير نظام هو شايفه إن ده غلط. قامت ثورة ٢٥ يناير لإسقاط كل حاجة فاسدة في البلد، بس طبعا كانت مدة قصيرة أوي وبعد كده

ثورة: كلمة احنا مش فاهمين معناها. والدليل على كده إن احنا عملنا ثورة ولفينا ولفينا وأستأمننا اللي خائنا أول مرة.

في بلد عايزة تحتلك، هحارب، هحارب من غير تفكير. مش هفكر. واحد جي ياخد بلدي، ياخذ بيتي، هحاربه، أكيد من غير تفكير. لكن مثلاً ٢٥ يناير دي، بيحارب الرئيس بتاع بلده... دي حاجة تانية خالص. يعني دي ثورة أحسن من ثورة ٥٢. ليه؟ لأنه ثورة ٥٢ ده يعني، لما سموه إنه إنقلاب، عندهم حق. إنجلترا سمته إنقلاب. آه، هو إنقلاب. ليه؟ لأن هما الضباط اللي عملوه. إنما دي ثورة لإن الشعب من القاع هو اللي عملها، فهي فعلاً ثورة.

الثورة بالنسبالي هو غضب شعبي ورفض لنظام إقتصادي يتبعه سياسي. صعب أقول إن ٢٥ يناير ثورة. أنا بسمي ٢٥ يناير «حركات شعبية» لكنها لم تصل لدرجة الثورة. لأنها لو كانت ثورة، كان زمانا مستعناش بالجيش ولا أي حاجة وكنا وصلنا لدرجة إن احنا اخترقنا القصر الرئاسي وأماكن السيادة الخاصة بالنظام السابق وتم إنتزاع هذه الأماكن من القائمين عليها وعمل إحلال وتبديل للقيادة بتاعت الثورة دي.

الشعب هو اللي بيقوى النظام. هما اللي بيطلوله، هما اللي بيخلوه يبقى أقوى. فشايك إن احنا بجد عايزين ثورة ضد شعب، مش ثورة ضد نظام.

يقولك: «مين اللي هيمسكنا؟ مين اللي هيمسكنا؟» لأ، إنت عملت ثورة عشان إنت اللي عايز تمسك نفسك، مش عشان حد يمسكك.

دايماً في عندنا مشكلة إن احنا محتاجين حد يقود. الثورة دي من غير قائد، تمام؟ فطبعا ثورة من غير قائد... واحد موحد والكل عينيهم عليه والكل ماشي وراه... هتبقى يعني أحزبة. ناس: «عشان الجوع»، وناس: «عشان التحرش»، وناس: «عشان الماديات»، وناس: «عشان السياسة»، وناس... يعني أنا ممكن أقولك إن الثورة دي ممكن في حد مش عايز حسني مبارك يبقى رئيس، عايز يبقى هو الرئيس. ممكن السيسي اللي عمل الثورة. أنا عارف؟ أنا عارف؟ ممكن يكون فيها مطمع سياسي، ممكن أمريكا... زي أصابع خارجية دي. الله أعلم! أنا عارف؟ أنا عارف مين؟

يعني في ناس بتقول: «ثورة جيا»، أنا من وجهة نظري المفروض تبقى ثورة كرامة، مش ثورة جيا. ثورة ضد إنه ظابط يهين حد أو يشتمه أو إن أمين شرطة يمسك واحد يضربه، يعذب بنت، أو ينتهكوا أعراض الناس. دي كلها داخلة في كرامة البني آدم وإنسانيته يعني. بس ده كمان مات بسبب النظام، يعني النظام قتل في الناس، حتى الشعور بالكرامة والإنسانية، قتله تماماً.

أنا بالنسبالي كلمة ثورة، حياتي اللي محدش يشاركني فيها بحاجة غلط، عايز كل حاجة فيها صح. هثور على نفسي حتى لو أنا غلط: هثور على نفسي، قبل ما أثور على حد بره. فهي الثورة على النفس قبل الثورة على فسسسس.

لو النهارده احنا بنقول «احنا نازلين مجموعة كبيرة». مجموعة كبيرة يعني ميت ألف، مش خمسة-ستة-عشرة في الشارع. فالكلمة خدت مقامها، خدت وزنها، بقينا عارفين لما نقول: «ثورة»، ونقول: «هنعمل كده، هنتجمع، هنتج، هنبقى في ثورة»، الناس... الناس الحكومة فاهمة إن احنا مبنهرجش.

بالنسبالي حصلت ثورة بس ثورة إيه... مثلاً فشلت في الآخر إن هي إيه... مغيرتش النظام اللي هو كان فاسد. هي حصلت ثورة تمام، بس ثورة مكملتش يعني.

في واقعة شهيرة لأثور السادات في كامب ديفيد مع وزراء الخارجية ومع مستشاريه السياسيين وو

إلى آخره... فبيقولوه: «يا فندم الإتفاقية...» وزير خارجيته بيقوله: «يا فندم الإتفاقية بتتبلور لكن اللي أنا عايز أنبه حضرتك له إن أنت أمام حيازة لسيناء وليس سيادة على سيناء». فالرئيس السادات قام خبط على الترابيزة وقال: «إيه الكلام ده! هو أنا هركب الأرض ولا لأ؟» قالوله: «يا فندم تركب الأرض حيازة ولا سيادة؟» - «لأ، لأ، لأ، لأ، أنا مش عايز كلام المثقفين ده! أنا خلاص خدت الأرض، هرفع عليها العلم بتاعي». ثم تأتي الأيام اللي نكتشف إنها حيازة وليست سيادة. فاحنا كده... احنا كده نتعامل مع أفكار مثقفينا وأدبائنا ومفكرينا... نتعامل معها على إنها تخدش حياء الجمال وتفسد عليك روعة اللحظة.

فأنا، أنا في تصوري، في تصوري إننا أحياناً كثير جداً بنقبل ببعض المصطلحات ونرضى بيها وبنتبناها وبنتمسك بيها، لا شيء حتى لا نخدش حياء الجمال. فا ٢٥ يناير: ثورة. ٣٠ يونيو: ثورة. ليه كده؟ ليه؟ لإننا لو وقفنا عند المصطلح وأعملنا المصطلح العلمي، هنكتشف إننا بنخدش حياء جمال هؤلاء المصريين اللي خرجوا في الميادين... بنخدش حياء النتيجة الرائعة: سقوط النظام وسقوط مبارك وسقوط محمد مرسي.

بالنسبالي كلمة الثورة ممكن تحصل بطريقة غير... غير التقليدية اللي هي تطلعي في الشارع وتعملي ثورة زي ما حصل في مصر قبل كده أو في كوبا أو كل الثورات دي. السياسة حاجة وسخة أصلاً. يعني دي وجهة نظري إن في الآخر خالص، مفيش سياسة نضيفة. يعني مفيش حاجة هتبقى أنصف من حاجة تانية. هي كلها وسخة في وسخة. في الآخر أنا شايفة إنه يعني، يا ريت نلاقي طريقة جديدة إن احنا نعمل بيها ثورة... لو في يعني، فاهمة؟ ثورة أو نغير الدنيا بطريقة مختلفة.